

مکرمات

ادبی و سیاسی رسالهٔ اسبوعیه در

۳۱ نجی سنه

۱۶ ربیع الآخر ۱۳۳۰

پنجشنبه

جزء عدد : ۱۴۰

ارمنیجه طباعتك ۴۰۰ نجی سنه اختراعی

(آزادامارد) غزتهسی ، ارمنی الفباسنك فن طباعته تطبیقنك درت یوزنجی دوره سنویهسی مناسبتیه بوسنه بر (آیین مخصوص) اجراسی مادهسینك قافقاسیه غزتهلری طرفدن تكلیف اولندیغنی و بونك ایچون تقلیسده بر قومیسون بیله تشكلی ایندیكنی بیاندن صكره (فخریه ملیه) یولنده بعض مطالعات سرد ایلدور . وسائط علم و عرفانك اقدم و اهمی اولان فن طبیی تقدیر ایله لسانه تطبیقنی تصور ایتمش اولان بر قوم ، عالم فضل و معرفتده بحق فخر ایدمبیلیر . چونكه دنیاده طباعت اشرف صنایعدر . و چونكه تاریخ مدنیت و معرفت آگا مرجع و آگا فائق و علی الخصوص آندن انفع بر صنعت و اختراع و قوعنی قید و ضبط ایتماشدر .

اگر فن طباعت ، الیوم معلومز اولان شكلنی بوندن درت یوز سنه اول اکتساب ایتماش اولسه ایدی بوگون بشریت ، اقوام فاضله عندنده رایكان اولان وسائط معرفت و مدنیتدن بیگده برینه مالك اولممازدی . و هیچ شبهیه محل یوقدركه انسانیت ، آندن اولکی ادوارد بولندیغنی وجهله كورانه بر جهل و غفلت ایله تعقیب اعصارده دها چوق زمان دوام ایدر کیدردی .

شوراسی ده شایان تذكاردركه بوفن جلیلك قدری هنوز اقوام شرقیه عندنده لایقی وجهله تقدیر اولتماش اولمسنندن دركه آنك تأمین ایستیکی منافعدن حقیله استفاده ایدیله مامكدهدر . مع مافیه هر آتی قریب اولمسنه نظراً آنلرده نعمت عظمای طباعتدن مستقبلا مستفید اولسه گر كدر .

(آزادمارد) لك مفاخر ملیه دن شمار ایدلیکی بوماده شایان تدقیق گورینور .
 چونكه براختراعدن بحث ایدلیکی حالده مختراعك ده تعینی اقتضا ایدر . و چونكه
 هر بر اثر بر مؤثره مفتقردر . عجیبا ارمنی حروفك مخترعی کیمر ؟ و ارمنی
 حروفیله ایلک کتابی هانکی مطبعه ملیه تمثیل ایتشدر . ظن ایدر كه آزادمارد ،
 یاخود آنك ترجان اولدینی قافقاسیه ده کی ارمنیجه مطبوعات . بونی خبر ویرمكه
 دوچار مشكلات اولسه بیله مختراعات ملیه عدداینه ادخاله قدرتیاب اوماز .
 القباى عربیه - كه بزم دخی آلت کتابتزدرد - ۱۵۱۲ تاریخ میلادیسنده
 طباعته تطبیق اولغش و آنكله ایلک کتاب ۱۵۱۴ سنه سنده وندیكده باصیلان
 (ادعیه سبعة) نامنده کی رساله اولدینی تاریخ طباعتده مقید بولنشدر .
 شو حالده بز تركلرك واسطه تحریر و تبلیغز اولان حروف عربیه دخی ارمنی
 حرفلریله بر سنه ده ایجاد ایدلشدر . فقط هر ایکیسنك ده فخر و شرفی ایکنجی
 یولیوس پایاه طاندرد . نه بزه نه ارمنیلره در .

ابوالضیا

